

20
22

ISLA ONLINE
Noticia Transparente di Gobierno

Diaranson 12 October 2022

Email: IslaOnline@gobierno.aw Tel: 528-4952



Gabinete Wever-Croes //

OCTOBER
LUNA DI CONSCIENTISACION DI
CANCER NA PECHO

ISLA
ONLINE

Noticia di Gobierno



KLAS 4 DI LA SALLE COLLEGE A BISHITA PROME MINISTER DEN CUADRO DI LES TOCANTE 'STAATSINRICHTING'



E siman aki Prome Minister Evelyn Wever - Croes hunto cu Minister di Enseñansa y Deporte Endy Croes, a ricibi bishita di alumnonan di klas 4 di La Salle College. E alumnonan den cuadro di nan les di 'Staatsinrichting' a bishita Parlamento di Aruba y despues Bestuurskantoor. Na e ocasion Prome Minister a elabora un poco riba e trabou di un Minister, responsabilidadnan, Consejo di Minister y e organo mas halto cu ta tuma decision den gobierno.

E grupo di estudiante tabatin preguntanan hopi interesante specialmente riba e temanan di enseñansa y deporte. Prome Minister a splica e hobennan cu gobierno ta trahando riba mas oportunidad posibel, pero cu Aruba ta keda un Pais chikito. Sinembargo, ta trahando cu Corsou y Boneiro pa mira si hunto por ofrece mas oportunidad na nos hobennan.

Por ultimo, Premier Wever - Croes a gradici La Salle College pa e interes demostra y ta kere cu ta sumamente importante pa inculca den nos hobennan e balornan democratico. Den e caso aki, a base di e preguntanan cu nan a haci na Prome Minister, ta mira cu e hobennan ta hopi bon prepara, motiva y cu pasion, cual ta duna speransa pa futuro.



Prome Minister Evelyn Wever-Croes:

PROME MINISTER Y MINISTER DI HUSTICIA A INFORMA PARLAMENTO RIBA E TEMATICA DI FRONTERA CU VENEZUELA



Diaranson mainta, durante reunion publico den Parlamento, Prome Minister Evelyn Wever-Croes y Minister di Husticia, señor Rocco Tjon, a duna splicacion amplio riba e tematica di frontera cu Venezuela. Prome Minister a enfatisa cu esaki ta un tema dificil y delicado y a remarca cu Gobierno di Aruba ta na mesa cu autoridadnan di Venezuela pa yega na bon palabracion riba un apertura di e frontera sigur y responsabel.

Prome Minister a splica dicon e frontera ta cera na prome luga y kico Gobierno ta haciendo pa yega na un re-apertura di un frontera na un manera responsabel. Gobierno ta presente den Parlamento pa motibo cu tin cierto bruhamiento di tera ta tuma luga riba e area aki y ta necesario pa trece claridad. “Mi kier a haci un apelacion serio riba Parlamento specialmente oposicion y señor Mansur cu no tawata presente den e reunion, e tema aki ta uno hopi delicado y no ta un tema cu ta presta su mes pa ningun tipo di speculacion ni bruhamiento di tera”, Prome Minister a enfatisa.

PETICIONNAN:

Prome Minister a remarca cu Gobierno ta wordo acerca pa dos tipo di peticion. E prome ta esnan cu ta pidi pa habri frontera pa nan por bishita nan famianan na Venezuela. Aworakinan e frontera ta cera pero por yega via Panama, Colombia y Santo Domingo pero e rutanen pa hopi ta mucho costoso. E otro peticion ta bin di parti di comercio, pa asina nan por importa productonan y materialnan mas barata pa nan por bende akinan. Un di tres peticion cu ta bin acerca ta e aspecto diplomatico cu Aruba no ta den guerra cu Venezuela pues no por keda cu e frontera cera sin limite.

JANUARI 2018:

Frontera cu Venezuela ta cera desde Januari 2018 despues cu Presidente Nicolas Maduro unilateralmente a cera frontera cu Aruba, Corsou y cu Boneiro y a acusa nos di ta horta tur nan koper. Ora cu a bay haci investigacion a bin descubri cu berdad koper ta wordo saca di Venezuela, e ta pasa Aruba pero no ta keda Aruba sino ta bay otro paisnan. Aduana di Aruba a haci investigacion y yega na conclusion cu tur doorvoer cu tabata tin di koper a pasa cu e documentonan oficial di autoridadnan Venezolano. Riba esaki Venezuela a indica cu e documentonan por tabata falsifica. Asina Gobierno di Aruba a sinta na mesa cu autoridadnan di Venezuela pa siña conoce ta

kico e formularionan y e stempelnan official di Venezuela ta. E negociacionnan ey a sigui te mediano di aña na 2018 ora cu a yega na palabracionnan hopi bon entre autoridadnan maritimo di Aruba y Venezuela. A habri fronteranan bek y tabata tin un comunicacion hopi estrecho entre e haven meester di Aruba y haven meester di Venezuela. Acuerdonan a wordo stipula entre otro un boto por sali solamente di estado Falcon pa bin Aruba cu a facilita trabou di haven meester di Aruba cu tawata sa adelanta ken ta bin y kico nan ta bin cu ne.

JANUARI 2019:

Na Januari 2019 Presdidente Maduro a bolbe dal e frontera cera cu Aruba, Bonaire y Corsou. E biaha aki pasobra Corsou a bira manera un hub humanitario pa ayudo den Venezuela y e Presidente no a gusta e maneho ey y a cera e frontera. E tempo ey nos comercio a caba di recupera di e ciere na comienso di aña 2018, comercio a dicidi cu no lo warda mas pa e situacion politico na Venezuela cambia y nan a cuminsa busca otro rutanen alternativo.

MEI DI 2019:

Riba un diabierna mainta na Mei di 2019 mientras fronteranan ta cera ainda, Gobierno di Aruba a haya notificacion cu Venezuela a dicidi cu e ta habri frontera bek. Unilateralmente y sin consulta, nan a habri e frontera bek cu Aruba y tabata tin avionnan en ruta pa Aruba. E momento ey Aruba tawata tin riba 2000 peticion pendiente pa asilo politico di personanan di decendencia Venezolano y a dicidi di cera e frontera pasobra Aruba nos no tawata cla pa habri'e bek. E situacion te cu awe ta cu e frontera entre Aruba y Venezuela ta cera for di Aruba y e frontera entre Corsou y Boneiro ta cera door di Venezuela. Gobierno di Aruba, na Mei 2019 a extende un invitacion na autoridadnan Venezolano pa bay bek mesa y papia riba e condicionnan pa re-apertura di e frontera. Pero ta te na 2020 a logra haya nan pa bin na mesa. Sinembargo covid a dal y tur cos a para bek.

Prome Minister a duna di conoce cu na e momentonan aki, e posicion di Aruba ta sigui igual. Pa habri e frontera mester yega na palabracionnan concreto cu autoridadnan Venezolano. Mester yega na acuerdo riba e condicionnan pa evita problemanan manera a encontra na 2018 y 2019. Pues e posicion di Aruba ta papia prome, yega na palabracion y despues lo anuncia re-apertura. Venezuela ta prefera anuncia prome.

“Ultimo lunanan autoridadnan Venezolano a mostra mas interes. Mi a papia cu e canciyer di Venezuela na Honduras y el a expresa interes pa habri frontera y mi a bise cu sigur ta posibel pero mester sinta na mesa y papia di condicionnan. E combersacionnan ta biniendo poco poco riba pia y mi ta spera cu nos por tin bon palabracionnan pa Aruba ta sigur cu harbrimento di frontera ta safe y sigur y responsabel.

Prome Minister Evelyn Wever-Croes:

Comision cu ta encarga cu e tema di frontera cu Venezuela

TA CONSEHA GOBIERNO PA NO HABRI FRONTERA MIENTRAS AINDA TA NA MESA DI DELIBERACION

Durante e reunion publico den Parlamento diaranson mainta pa trata e tematica di frontera cu Venezuela, Prome Minister Evelyn Wever-Croes a duna un splicacion di e maneho di e comision cu ta encarga cu e tema aki. Mirando cu e crisis na Venezuela ta escala na nivel di crisis, a instala e comision cu tin e tarea tambe pa conseha Gobierno riba esaki.

Prome Minister a indica cu comision a duna Gobierno e conseho pa mantene e frontera cera principalmente pasobra ainda ta na mesa di deliberacion y tambe pa motibo di e riesgonan cu tin. Gobierno ta haci esaki a traves di un Landsbesluit cu ta saca cada tres luna of menos. E ultimo conseho tabata pa prolonga ciera pa tres luna te na fin di aña. Pero si keda cla cu palabracionnan prome, por haci cambio y habri frontera.

COMISION:

E comision ta consisti di diferente stakeholder y ta consulta cu diferente stakeholder. E ta wordo dirigi door di Bureau Rampenbestrijding Aruba (BRA), y ta hiba combersacionnan cu Directie Buitenlandse Betrekkingen (DBB), Veiligheidsdienst Aruba (VDA), Cuerpo Policial, Dimas, DVG, Directie Sociale Zaken, DOW, Directie Luchtvaart, Directie Scheepvaart, ATA, Inmigracion Aruba, Havenmeester di Aruba, Kustwacht di Aruba y representante di Ministerio di Husticia encarga cu grensversterking den cuadro di e landspakket, Directie Economische Zaken y un representante di Ministerio di Economische Zaken pa atende cu e aspectonan economico di esaki.

CUATRO DIFERENTE TIPO DI RE-APERTURA:

Riba peticion di Gobierno, e comision ta trahando, no ta di awo, riba e tema aki cu ta wordo distingui den cuatro diferente tipo di re-apertura. E prome dosnan tin di haber cu trafico maritimo y e otro dosnan tin di haber cu trafico aereo.

Pa loke ta trafico maritimo, e prome cu ta pensando riba dje ta habri e ruta di e waf di Venezuela pa Aruba pa asina por transporta fruta, berdura y cierto materialnan. Despues un siguiente stap lo ta pa habri pa yatenan priva, cu aworaki no ta posibel.

Pa e parti aereo, ta pensa pa habri aeropuerto principal Reina Beatrix cu vuelonan Aruba-Venezuela y Venezuela-Aruba. Y e otro parti cu lo bin despues ta pa habri pa jetnan priva tambe.

Na e momentonan aki, ta trahando riba e parti maritimo. Gobierno



a pone riba papel un lista di condicionnan cu palabracionnan concreto. Entre otro condicion, ta e documentonan cu un capitan di un barco mester tin den su man prome cu e sali for di waf di Falcon y prome cu e drenta Aruba. “Esaki ya caba ta algo cu a traha bon, y ta loke nos kier e biaha aki tambe”, Prome Minister a duna di conoce.

STAKEHOLDER:

Diferente stakeholder, entre otro Cuerpo Policial y Inmigracion ta identifica e riesgonan (knelpunten) cu re-apertura di frontera. Dimas tambe a indica cu su preocupacion principal na momento cu habri frontera, ta e tema di asilo. E tema aki ta un tema hopi delicado pasobra ta trata di personanan y sufrimento di personanan. Tambe ta preocupa cu bishitanan di famia cu lo drenta, anto hopi biaha nan no ta bay bek. Esey ta e tendencia cu a mira den pasado cu ta wordo yama ‘overstayers’. Hendenan ta keda Aruba y nan ta drenta e circuito ilegal cu ta un problema pa Aruba.

“Mi tin tur confiansa cu si ambos parti demostra e disponibilidad pa yega na palabracionnan, nos lo por sali afor. Nos ta convivi cu e situacion na Venezuela cu ta haci nos dolor pasobra hopi di nos tin familiar cu a bin di Venezuela. Nos tin laso cultural y economico. Venezuela ta hopi mas cerca cu otro paisnan. Pero nos no por soluciona e problema di Venezuela. Nos ta luchando pa resolve mos propio problemanan, pero e problema di Venezuela y den Venezuela ta nan mester solucione. Mientrastanto nos mester percura pa Aruba recupera y ta fuerte, pa nos ta para riba nos pia y yuda tur cu ta biba akinan. Sea bo a nace aki of no, e ta nos responsabilidad pa yuda tur akinan. Drecha calidad di bida di nos hendenan, crea mas cupo di empleo pa nan tambe, percura pa tin educacion riba nivel pa tur nos muchanan. Y ora nos ta para fuerte riba nos pia, nos por yuda otro pais mas miho”, Prome Minister a expresa.

EMERGENCY NURSE DAY

— 12 OCTOBER —

♡ **STANDING STRONG** ♡





MINISTER MADURO DI FINANSA A ATENDE E REUNION DI IMF HUNTO CU PAISNAN DEN CARIBE RIBA E RETO DI INSEGURIDAD CAUSA PA PRIJSNAN HALTO DI ENERGIA Y CUMINDA

Hunto cu otro Ministernan di Finansa di Caribe, Minister Maduro a atende e reunion riba e reto di inseguridad causa pa prijsnan halto di energia y cuminda den Caribe.

IMF ta enfatisa cu prijsnan halto di energia y di cuminda ta causando inflacion rond mundo. Nan ta adverti cu specialmente e Paisnan den Caribe mester atencion pa e retonan cu nan tur ta aden. Subida di prijs di energia y di cuminda ta un problema cu ta afecta tur Pais den Caribe, incluso Aruba. Pa e motibo aki, IMF a pone fondo disponibel pa yuda e Paisnan den Caribe pero Aruba no ta bin na remarca pa e fondonan aki. Esaki debi na e hecho cu Aruba ta forma parti di Reino Hulandes. No obstante esaki, ta importante pa por scucha kico e Paisnan den Caribe ta haciendo pa asina por mitiga e efecto inflatorio y tambe sigura cu cuminda ta keda disponibel y pagabel na e Pais. Pa Aruba ta importante pa explora ki opcion tin pa por trece seguridad y alivio pa nos Pueblo den e temponan dificil aki.



RCC ARUBA TA PROMOVE ARUBA RIBA TARIMA INTERNACIONAL



Recientemente e grupo RCC Aruba a bishita Minister Maduro pa brinda informacion riba nan presentacionnan internacional den cual nan ta promove Aruba. Minister Xiomara ta aprecia cu den cada presentacion cu RCC Aruba haci nan ta carga bandera di Pais Aruba.

EXITOSO PRESENTACIONNAN INTERNACIONAL

RCC Aruba ta consisti di bailarin y acrobata Arubiano, Colombiano, Cubano y Venezolano cu a haci Aruba nan cas. Desde aña 2019 RCC Aruba ta participando na Festivalnan di Circo internacional, na China y na Budapest, Hungria. Na Budapest, RCC Aruba a cay den premiacion y a haya varios oferta pa presenta na mas Circo renombra rond mundo. Mas reciente RCC Aruba a presenta na e 'Summer Circus & Water Spectacular' na e prestigioso Circo Hippodrome na Londres, Inglatera. Durante e periodo di 8 di juli te cu 18 di september, e artistanan aki a presenta un total di 123 show. E Circus Hippodrome ta e unico circo na mundo cu su tarima ta rondona cu awa. RCC Aruba a duna un tremendo show y a wordo promovi como e atraccion principal di tur e shownan, promoviendo Pais Aruba grandemente.

PARTIPACION Y CLASIFICACION NA AGT

RCC Aruba a participa y a laga Aruba su number resona pa prome biaha den e popular programa 'Americas' Got Talent' (AGT) y a clasifica pa e di dos rond. Lamentablemente door di un accidente chikito di un di e artistanan, e grupo no por a sigui cu nan presentacion pa e di dos rond, pero lo bay participa den AGT otro aña.

SHOW LOCAL

Actualmente RCC Aruba ta presentando show den varios hotel pa e turistanan cu ta keda den e hotel. Pronto nan lo presenta shownan local pa asina pueblo en general y tambe nos bisitantenan den exterior por bin disfruta di e presentacionnan aki.

PRESENTACION NA ALEMANIA Y ITALIA

Na december RCC Aruba lo bay presenta na Fli Flac Circus na Kassen, Alemania. Esaki ta un otro contrato cu nan a haya door di nan exitoso presentacion na Hungria. Tambe e artistanan a ricibi un invitacion di promotornan di e programa 'Italy Got Talent' pa bin presenta na januari 2023 den nan programa.

ARUBA TA WORDO PROMOVI RIBA TARIMA INTERNACIONAL

E directornan di RCC Aruba sr. Diego Jaramillo Ospina y sra. Jamila Hernandez durante nan bishita na Minister di Cultura a entrega un buki di programa di Circus Hippodrome, den cual nan ta promove Pais Aruba y tambe pa gradici pa e apoyo cu semper nan ta ricibi.

E mandatario na su turno tambe ta gradici e artistanan cu un bes mas nan ta hiba number di Aruba y su bandera durante nan presentacionnan riba tarima internacional. Minister Xiomara ta gradici tur e artistanan pa e tremendo trabou cu nan ta haci pa promove Aruba. E dignatario ta enfatisa cu ta di aprecia cu e talentonan residencia na Aruba unda cu nan bay den exterior ta carga bandera di Aruba cu hopi orguyo y honor. Minister Maduro ta desea tur e artistanan di RCC Aruba hopi exito den nan shownan local y presentacionnan den exterior.



BAN DUNA APRECIO NA NOS ENFERMO/A NAN DI EMERGENCIA



Diaranson nos ta duna aprecio na nos enfermero/a nan di Spoed Eisende Hulp (SEH), esaki no ta un dia internacional pero ya pa varios aña ta wordo celebra na HOH y na ImSan. Den conexion cu esaki Minister di Turismo y Salud Publico

sr. Dangui Oduber a reparti un bebida saludabel na nos enfermero/a nan como un toke di aprecio pa e trabounan cu nan ta eherse.

Riba e dia aki nos mester para keto, muestra nos gratitud y aprecia e esfuerzo den cuido cu nos enfermero/a nan di SEH ta duna na e pashentnan di nos pais. Na cualkier momento cu personanan tin un emergencia medico of ta den un accident, e prome hendenan pa atende nan ta e enfermero/a nan aki. Nan ta traha extremadamente duro pa sigura cu tur pashent ta confortabel y sin dolor of malestar. E esfuerzo cu nan ta pone den nan trabou por bay desapercibi, pesey e dia aki ta existi pa asina nos por aprecianan.

Minister Oduber ta gradici cada un di e enfermero/a nan di SEH pa e trabounan cu nan ta haci pa nos comunidad. Keda para hunto manera semper boso a haci pa asina enfrenta cualkier reto cu por tin riba un dia menos bon.

STANDING STRONG.

Minister Dangui Oduber:

MINISTER ODUBER DI BISHITA NA BRICKELL BAY BEACH CLUB & SPA

Diaranson mainta Minister di Turismo y Salud Publico, Sr. Dangui Oduber, a bishita Brickell Bay Beach Club & Spa. Minister a ser encontra pa e doño nobo di e hotel sr. Sr Visser, hunto cu e Gerente General sr. Juan Keyter y tambe sra. Marvel Vilchez cu ta e Sales & Marketing Director, kende a splica over di e plan cu Brickell Bay tin pa futuro di e hotel aki. Na e momentonan aki a cuminsa cu renobacion di tur e cambernan. Nan lo renoba tambe e lobby area y e pool area den e siguiente lunanan pa asina por ofrece turista un mihor servicio y calidad moderno.

Pronto Brickell Bay lo cuminsa opera bow di un otro brand, cual nan mes lo anuncia den futuro cercano. Nan deseo ta pa amplea e propiedad aki cu cincuenta extra kamber. Minister Oduber ta menciona cu ta spera di por haña cooperashon di stakeholders pa cu esaki. Turismo ta keda e driver principal di nos economia y tur e visionan aki lo yuda eleva e producto cu nos ta brinda na nos bishitantenan.

Minister Oduber kier gradici e gerente y e staff di e hotel pa un bishita agradabel caminda cu nan a papia tocante varios tema incluyendo innovacion, inversion y remodelacion. Minister Oduber ta sumamente satisfecho cu e recorrido aki y cu tur informacion adkiri. Tambe ta extende un palabra di danki na tur trahado cu ta hasi nan esfuerzo tur dia pa ofrece servicio di calidad y traha den un industria asina crucial pa pais Aruba.





MINISTER GEOFFREY WEVER A BAI ATENDE E CARIBBEAN DEVELOPMENT ROUNDTABLE NA SURINAM ORGANISA DOOR DI ECLAC

Diaranson 12 october, Minister Geoffrey Wever a biaha pa Suriname pa asisti na e Caribbean Development Roundtable y e Caribbean Development and Cooperation Committee cu lo tuma lugar 12-14 October 2022 na Paramaribo, Suriname.

E organisador di reunion ta e Subregional Headquarters di e Economic Commission for Latin America and the Caribbean (ECLAC) cu ta enfoca specificamente riba region di Caribe.

E reunion di e Caribbean Development Roundtable ta mas un dialogo riba varios temanan cu ta toca e Caribe y e Caribbean Development and Cooperation Committee ta unda e progreso di e trabou y e focus di ECLAC pa e aña siguiente lo wordo stipula por medio di resolucioannan.

Lo trata diferente tema, entre otro:

- Global partnership for repositioning, recovery and resilience in the Caribbean;
- Economic restructuring and diversification for deeper integration of the Caribbean with Latin America and in the global economy;
- Towards the Establishment of the Caribbean Resilience Fund.

E aspecto interesante di e Roundtable ta cu e paisnan ta bini hunto y dialoga over e temanan aki y con por logra esaki conhuntamente. Despues di e impacto di COVID-19 ta importante pa e paisnan den nos region ta prepara, p'esei lo papia riba creacion di un fondo pa Caribe conoci como un fondo di resiliencia pa yuda paisnan miembro absorba golpe economico externo.

Como organisador di e evento, ECLAC ta cubri tur e gasto di biahe y estadia involvi.





REAPERTURA DI FRONTERA CU VENEZUELA MESTER BAY DEN FASE



Diaranson mainta, Minister di Husticia y Asuntonan Social hunto cu colega Minister President Sra. Evelyn Wever-Croes a atende reunion publico den Parlamento di Aruba, pa asina trata e tematica di reapertura di frontera cu Venezuela.

Minister Tjon a indica cu Gobierno di Aruba tin e deber y e responsabilidad di mira e situacion di cada angulo y tene diferente aspecto den consideracion. Entre otro e deber ta pa tene cuenta cu aspectonan di salubridad publico, aspectonan di siguridad di cada ciudadano, aspectonan di asilo, y e situacion financiero di pais Aruba, pa menciona algun cos. Como tal, e decision pa habri e frontera ta algo cu tin cu bay den fase, pues no ta un decision cu por wordo tuma facilmente.

Importante pa menciona ta, cu di parti di Ministerio di Husticia y Asuntonan Social ya caba a introduci diferente comision cu ta evalua e situacion aki y tin un Justitieel Veiligheidsberaad

como tambe un Strategisch Grensoverleg cu ta tene cuenta cu e parti hudicial y e siguridad di nos frontera. Asina por menciona cu danki na e comisionnan aki cu a wordo instala, tin un cooperacion mas estrecho entre departamentonan hudicial, cual a haci cu ultimamente nos ta interceptando diferente botonan cu personanan indocumenta abordo cu ta purba di dreña nos isla na un forma ilicito.

Por ultimo, mester menciona tambe cu despues di e crisis mundial di Covid, mester bisa cu e prioridad primordial di Gobierno di Aruba ta pa brinda e ayudo y e sosten na nos ciudadanonan na prome luga pa asina nos por amplia nos capacidad y brinda e ayudo necesario na otronan. Pues, prome cu nos yega na habri e frontera cu Venezuela, tin diferente accionnan cu tin cu tuma luga pero tambe nos tin e deber pa tene cuenta cu consehonan di reino den e caso aki, pa loke ta trata e tematica aki.

Minister Rocco Tjon:

INVESTIGADONAN ACADEMICO DI IPA Y VRIJE UNIVERSITEIT AMSTERDAM LO BAY EHECUTA E INVESTIGACION "QUALITY OF LIFE OF THE ARUBAN YOUTH"

Recientemente, minister di Husticia y Asuntonan Social Sr. Rocco Tjon a reuni cu e investigadonan academico di IPA y Vrije Universiteit Amsterdam, kende ta e investigadonan cu ta bay ehecuta e investigacion "quality of life of the Aruban youth". Ministerio di Husticia y Asuntonan Social ta kere den "evidence based policy", y a base di e informacion cu ta bay wordo colecta di e investigacion aki, lo bay traha un plan di maneho multianual pa cu esaki.

Tur e trabounan preliminar pa loke ta e investigacion y e cuestionario ta cla, y esakinan a wordo examina tambe, cual ta nifica cu aworaki nos ta den e fase di ehecucion. Si tur cos bay segun planificacion, e idea ta pa percura pa e recopilacion di data ta cla pa zomer 2023, y despues lo haci e analisisnan. E investigacion ta bay enfoca riba nos hobennan, pero tambe lo bay enfoca riba tur nos scolnan basico, mavo, scol avansa como tambe pa esnan di scol special.

Lo haci un encuesta enfoca riba e calidad di bida di alrededor di 4600/5000 estudiante di 5e y 6e klas di scol basico. E investigacion lo enfoca riba topiconan manera e antecedente di e salud mental di e famia di e hobennan, e antecedente cultural, actividadnan social, e ambiente escolar, bullying, autoestima pero tambe riba aspectonan di e bario. Y ora ta papia di barionan, ta link esaki mesora cu e proyecto di Veilige Barrios, akinan lo wak con nan experiencia ta den e bario, kico nan ta haya falta di dje, kico mas nan kier wak pa cu e desaroyo di e barionan etc. Banda di esaki tambe lo scoge dos pa tres scol di e ocho districtonan di Aruba y lo entrevista e directorado di e scol y lo haci ocho session den grupo cu mayornan di cada districto.

Por ultimo, e mandatario a indica cu ta trata di un investigacion hopi holistico y ta conta cu e colaboracion di Ministerio di Husticia y Asuntonan Social y Ministerio di Enseñansa y Deporte.





A RICIBI UN BUNITA PRESENTACION DI E PROYECTO DEPORTIVO DI SV BUBALI



Recientemente Minister di Enseñansa y Deporte a reuni cu directiva di SV Bubali, cu a haci un bon presentacion amplio di nan proyecto Deportivo. Presente na e reunion aki sr Ghisberto Figaroa, Presidente, sr Nicolas Quandus, secretario, sr Ryan Figaroa secundo secretario di SV Bubali. Nan a haci un presentacion di powerpoint riba nan proyecto cu pa hopi tempo tin den 'pipeline'. Nan a ilustra cu riba nan propio forsa y sosten di Superfood a logra pone nan lusnan, a agerha cu tabata un reto pa nan pero a logra e parti aki. Nan ambicion awor ta pa desaroya ful e compleho deportivo aki, cu cancha di football, cancha di tennis, cancha di beach tennis, veld di baseball pero nan concentracion awor aki ta riba e veld di futbol cu nan mester bai drecha y lanta 35 meter for di sub suela, pa motibo cu tin problematica di awa y cu un vision cu esaki lo ricibi su yerbe artificial.

Den e proyecto aki Gobierno como stakeholder ta bai yuda busca solucion y pa yega na e material cu mester pa yena e tereno aki cu lo ta costoso y den e di dos fase di e proyecto

ta e yerbe artificial na unda cu FIFA y AVB ta hunga un rol na momento cu yega asina leu. Minister Endy Croes a sigi elabora cu tambe di parti Gobierno ta bai aserca DOW pa yuda pa por cera e tereno parti dilanti pa e auto nan stop di draai riba e tereno aki. Un proyecto hopi ambicioso y hopi grandi, Minister Endy Croes a pidi directiva di Bubali pa ban traha den fase cu e proyecto aki, pa cuminsa na e parti cu ta mas importante prome, pa yena e tereno, yega te na e parti di veld cu yerba unda cu aki FIFA y AVB ta cai aden cu otro fondonan pa por yega na e yerba artificial y cera e yerba rond cu un heki.

Minister Endy Croes a sigi agrega cu den añanan nos dilanti lo sigi riba e proyecto ambicioso y grandi aki, pa logra veld di baseball, e canchanan di beachtennis, un 'clubhuis', zaalvoetbal, un proyecto pa deporte hopi bunita, un excelente powerpoint presentacion, pero mester cuminsa un caminda y Minister Endy Croes a finalisa cu sigur ta yuda y duna sosten pa SV Bubali por logra realisa nan excelente proyecto deportivo.

MINISTER ENDY CROES Y MINISTER GLENBERT CROES A REUNI RIBA PLATAFORMA ENSEÑANSA Y LABOR (PEL)

Recientemente Minister Endy Croes y Minister Glenbert Croes a reuni hunto cu sra Sabine de Groot di departamento di Labor y sra Sheila Maduro di maneho di enseñansa y director suplente di 'Directie Onderwijs' Aruba, punto di reunion riba continuacion y trabounan cu tin cu wordo haci e.o. e 'doorlichting' rapport di onderwijs, na unda cu un di e aspecto nan ta e PEL cu ta Plataforma Enseñansa y Labor, aki tin un nota skirbi y den cuadro di esaki, awor ta coordinando e maneho cu Enseñansa y Labor con ta sigi padilanti, kicko tur ta e necesidadnan di e mercado laboral y ki tipo di trabounan mester y na su turno departamento di Enseñansa su maneho mester bai prepara tur locual cu departamento di labor ta exige.

Den e 'doorlichting rapport' tin un capitulo unda ta splica cu mester coordina esaki hunto, mester tin data etc.. y prepara e Enseñansa na e tipo cu mercado laboral ta pidi, pa esnan cu ta caba di studia y ta drenta mercado laboral. Ariba e



puntonan aki e reunion a bai y a coordina entre Minister Endy Croes y Minister Glenbert Croes hunto cu Sabine de Groot di departamento di Labor y Sheila Maduro di maneho y director suplente di departamento di Enseñansa Aruba, ambos Minister a agrega cu tabata un bon reunion.

PROYECTO 'VEILIGE BARIOS' TA UN REALIDAD GOBIERNO DI ARUBA HUNTO CU CEDE ARUBA Y DIRECTIVANAN DI CENTRONAN DI BARIO A FIRMA UN MOU

Dialuna ultimo Gobierno di Aruba conhuntamente cu CEDE Aruba y nos Centronan di Bario a firma oficialmente e MOU pa asina realisa e proyecto di 'Veilige Barios'.

Pa Gobierno di Aruba e proyecto "Veilige Barios" ta sumamente importante pa cu desaroyo di pais Aruba y por lo tanto a aloca fondo adicional pa e proyecto aki por wordo ehecuta.

Pa di e forma aki mehora y eleva e funcionalidad y e calidad di nos centronan di bario pa hobennan y adultonan mayor, cu e meta pa trece mas seguridad den bario, brinda mas actividad y mas oportunidad tambe na cada ciudadano.

Un danki sigur na e stakeholder nan di e proyecto aki, CEDE Aruba e stakeholder mas fuerte cu a 'trek' e proyecto aki y a aloca 1.2 milyon florin y hunto cu Ministerio di Enseñansa y Deporte, Ministerio di Husticia y Ministerio di Minister Ursell Arends a pone extra fondo pa hacie 2milyon florin pa aña y pa di e forma aki haci e proyecto di "Veilige Barios" un realidad.

Un proyecto sumamente bunita y positivo pa pais Aruba, na unda cu lo bai trece programanan despues di scol den barrio rond di Aruba, pa yuda combati problemanan social y duna atencion. na nos muchanan y guia cu nan mester y ta percura pa e parti di infraestructura den e barionan. Un proyecto



sigur sumamente bunita, na unda diez Centro di Bario desde Sanicolas te cu Noord, a participa den e proyecto aki, y a firma e MOU dialuna ultimo hunto cu Gobierno di Aruba y CEDE Aruba y Ministersnan cu a aporta y sostene e proyecto den colaboracion y haci realidad. Prome Minister di Aruba Evelyn Wever-Croes presente na e ocasion aki a gradici y felicita colega Rocco Tjon, Minister Endy Croes y Minister Ursell Arends, CEDE Aruba y tur Centronan di Bario pa na un manera positivo y hunto traha na bienestar di e proyecto di 'Veilige Barios'

Departamento di Enseñansa Aruba: **ULTIMO DIA PA INSCRIBI PA LANDSEXAMEN 2023**



Departamento di Enseñansa Aruba (DEA), seccion examen, ta recorda cu awe, 12 di october 2022, ta ultimo dia pa inscribi pa Landsexamen MAVO, HAVO y VWO pa aña 2022 -2023.

Landsexamen ta brinda e oportunidad pa haal un diploma di MAVO, HAVO of VWO na un manera flexibel.

Un “landsexamen” ta igual na e examen di un scol secundario y un diploma di landsexamen MAVO, HAVO of VWO tin e mesun balor cu e diploma obteni via un scol secundario. Landsexamen ta aplica e mesun exigencianan pa examen (exameneisen) y e mesun “schriftelijke centrale examens”.

Esnan cu no ta bishita scol secundario (mas) pero cu ainda kier haal nan diploma, como tambe esnan cu kier haal certificado pa un of mas materia (vak) specifico por inscribi pa participa na Landsexamen. Esnan cu scoge pa participa na landsexamen no ta obliga pa haci examen den tur materia pareu. Bo por scoge pa haci examen y haal “deelcertificaten” pa un (1) of mas materia durante diferente aña escolar. Cada candidato tin maximo 10 aña pa haal su diploma via landsexamen.

Riba nos website ea.aw riba e pagina di Landsexamen por haya mas informacion di e similaridadnan y e diferencianan entre Landsexamen y scol secundario.

Con pa inscribi?

Pa inscribi mester yena formulario digital di inscripcion cu ta riba nos website www.ea.aw. Aki tambe lo mester upload un extracto di registro civil (afl. 5,-) cu no ta mas bieu cu 6 luna.

Mas informacion

Pa tur informacion tocante Landsexamen mester download e “Informatiebrochure Landsexamen 2023” for di nos website. Bay na www.ea.aw y riba e pagina principal busca Landsexamen na letter (L) den e alfabet menu.

Ta sugeri candidatonan y interesadonan pa sigui Departamento di Enseñansa Aruba riba Facebook y/of Instagram @EducationAruba pa keda na altura di tur informacion.

Feliz diaranson!

APESAR DI CAMINDA DIFICIL NOS DILANTI,
NOS POR, HUNTO NOS POR.
NOS POR ENGRANDECE NOS PAIS.
NOS POR FORTALECE NOS PAIS.
NOS POR SIRBI NOS PAIS.
Y HUNTO NOS POR HACI NOS PAIS
FUERTE Y RESILIENTE UN BIAHA MAS.
TA HUNTO SO NOS POR BRINDA
OPORTUNIDADNAN NA NOS
FUTURO GENERACIONNAN.



**20
22** | AÑA DI
INVERSION Y
OPORTUNIDAD